



Nouv chapitel pel Kleinhaus

MARTIN CAMICHEL/FMR

Daspö duos eivnas creschan las puntinedas sü per la fatscheda da l'uschè numno Kleinhaus dal Lyceum Alpinum Zuoz. Quist edifiz – chi serva als mats da la terza e quarta classa gimnasiela scu internat – vain uossa sano per 11 milliuns francs. Zieva ses mais vessan ils scolars da retrer la mited da november 2025 lur novas chambras – e que da nouv cun duschas e tualettas.

L'uschè numno Kleinhaus dal Lyceum Alpinum Zuoz es sto il punct da partenza per la scoula da media cun internat da renom internaziunel. Quist edifiz es gnieu fabricho l'an 1904 ed es già och ans pü tard gnieu ingrandieu cun l'uschè numno Grosshaus. Daspö lo sun l'ensemble da scoula e'l campus gnieu ingrandieu successivmaing. L'ultima vouta dal 2017/18 cun fabricher la nouva Chesa Urezza – ün ulteriur edifiz d'internat per las mattas cumprais staunzas da scoula.

Hozindi frequentan var 200 scolars interns e 125 scolars externs la scoula media a Zuoz. Cün la renovaziun dal Kleinhaus cumainza il Lyceum Alpinum uossa a saner sieus edifizs istorics. In quista chesa as rechattan – sper set staunzas da scoula i'l plaun terrain e'l prüm plaun – eir 30 staunzas d'internat cun 59 lets chi servan als mats da la terza e quarta classa gimnasiela scu alloggi.

Lavuors da construcziun da var ses mais

«L'ultima vouta cha quist edifiz es gnieu renovo substanzielmaing es sto düraunt ils ans 1960/70 e perque survain il Kleinhaus uossa üna granda sanaziun. Il plan da fabrica es magari pretensius cun ses mais, ma nus essans optimistic cha que funcziunaro bain», disch *Martin Scherer*, mner servezzans e finanzas tal Lyceum Alpinum Zuoz. Insembel cun il mner technic *Linard Parli* ho el declaro a la FMR ils plans da renovaziun pel Kleinhaus, chi d'eira auncha in plaina funcziun fin in gövgia passeda. Lo haun a mezdi cumanzo las vacanzas da meg pels scolars, ma ils magisters ed ulteriurs impiegos – in

tuot var 80 persunas – s'haun alura al zieva-mezdi dedichos a la rumida da quist edifiz. Las lavuors da renovaziun scu telas haun alura cumanzo quist lündeschdi.

Da nouv staunzas cun duscha e tualetta

«La prüm granda lavur ed intervenziun i'l stabiliment saro il fabricher d'ün chamin per ün lift (tud. Liftschacht), chi's tira dal plaun suot-terran sur ses etaschas fin suot il tet», disch *Linard Parli*. Quist lift dess in futur alura impustüt amegldrer la logistica e la lavur i'l minchadi per la squedra da las cunagiunzas – i'l Lyceum Alpinum vegnan quellas numnedas «signorinas» – ma eir da tuot l'equipa tecnica.

In seguit cumainzan alura las lavuors da sanaziun e renovaziun vi da las 30 chambras d'internat. Intaunt cha'ls scolars vaivan fin uossa be bagnes d'etascha, d'essan las staunzas da dormir survgnir in futur ün bagn cun duscha e tualetta. «Las staunzas survegnan üna tevladüra in larsch scu eir ün fuonz da parket. La capacited resta eir in futur la medemma, que gnaro tuot scumpartieu ün pö oter», disch

Martin Scherer. Uschè vain p.ex redimensiunada l'abitaziun dal mner da l'internat e que vain miss ad ir üna nouva staunza cumünäivla suot il tet cun bigliard, dart, fussballin ed otras activiteds da temp liber. Ma eir las staunzas da scoula i'l Kleinhaus vegnan renovadas cumplettaing e vegnan drizzedas aint tenor las pü novas pretaisas. E la chesa vain eir sanada dal radon, chi nu vess in avegnir – grazcha üna ventilaziun speciela – pü da gnir concentro uschè ferm i'l murütsch.

Separer il minchadi da scoula dal plazzel da fabrica

«La pü granda sfida cha nus vains a reguard il fabricher es cha'l Kleinhaus as rechatta precis

i'l center, la mited dal campus – uschè cha'l plazzel da fabrica schmezza il campus in duos parts», disch *Linard Parli*. Perque es gnida fabricada üna passarella provisorica vi da la fatscheda davous dal Kleinhaus, chi pussibilite-scha eir düraunt il temp da renovaziun cha tuot il manaschi da scoula funcziuna scu üsito. Però l'access a l'entreda principel e'l rondel nu saro düraunt ses mais pussibla. *Martin Scherer* agiundscha: «Que ans es fich important cha la gestiun da la scoula e dal plazzel da fabrica vegnan separedas – dimena ch'üngins scolars nu's rechattan sül fabricat e ch'üngins lavuraints as rechattan illa scoula – impustüt per garantir la sgürezza.» Ils scolars da la terza e quarta classa survegnan alura düraunt il temp da sanaziun ün alloggi i'l convict da giuventüna, il quèl as rechatta ün pèr tschient meters davent dal Lyceum.

11 milliuns francs pel Kleinhaus

Il büdschet per tuot il proget da renovaziun pel Kleinhaus – chi'd es gnieu elavuro in detagl düraunt ils ultims duos ans – es previs cun 11 milliuns francs. Quels po il Lyceum Alpinum finanzia tuot cun egens mezs e que grazcha al success da la scoula media ed internat i'ls ultims ans.

«L'ensemble dal Lyceum es dominant pel purtret da cumün da Zuoz, ma nus vainsa eir üna granda lezcha scu patrun da lavur cun var 170 impiegos e que düraunt 12 mais l'an. Perque esa eir important cha nus ans essans consciaints da quista rolla cha nus vains per Zuoz e vulainsa eir investir i'l futur», disch *Martin Scherer*. Scha tuot vo bain, esa previs d'inaugurer il Kleinhaus la mited da november cun ün di da las portas aviertas, uschè cha'ls scolars paun güst zieva retrer lur novas staunzas.

La Quotidiana
7007 Chur
081/ 255 52 52
<https://www.suedostschweiz.ch/laquotidiana>

Medienart: Print
Medientyp: Tages- und Wochenmedien
Auflage: 3'244
Erscheinungsweise: täglich




Seite: 7
Fläche: 82'740 mm²

Auftrag: 1096626
Themen-Nr.: 374007
Referenz:
3ae8afe9-5a6b-4165-9b5b-487b497f4a87
Ausschnitt Seite: 2/2



A partir da quist'eivna e per var ses mais vain renovo il Kleinhaus dal Lyceum Alpinum Zuoz. Da nouv dessan las stanzas d'internat in quist edifiz ei survgnir ün bagn cun duscha e tualetta.

FOTO MARTIN CAMICHEL



«L'ultima vouta cha'l Kleinhaus es gnieu renovo es sto düraunt ils ans 1960/70.»

Martin Scherer,
mader servezzans e finanzas
tal Lyceum Alpinum Zuoz

Il Kleinhaus al principi dal 20avel tschientiner. Quist edifiz es sto il punct da partenza da la scoula media cun internat a Zuoz.

FOTOS MAD